



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



US Senator Lindsey Graham ajungbena shiranger asü

South Africa nunger football asayar Jayden Adams süogo



VOL. XXIII ISSUE NO. 270 (ADOK 270) DIMAPUR TENTONÜ (MONDAY) CHITENI (JULY) 13, 2026

₹ 5.00

Manipur nung mi senoktsüba atema Kuki lennir 2 apu

Imphal, July 12, 2026 (Agencies): July 11 nü Leimakhong anasa Kanto Sabal nung mi senoktsüba aser nisung telok adenshia ozüing alema inyakba dak sendakba nung village chief ka dena Kuki lennir ana puogo.

Iba tatalokba nung Naga aser Meitei nunger ki aika nung mi senoktsü aser mission schools ana kakkoka tur raksatsüba den osettem auyaa bener ao ta Foothills Naga Co-ordination Committee (FNCC)-i aija metetdaksüogo.

Iba tatalokba dak sendakba nung State police, Central Reserve Police Force (CRPF), Rapid Action Force (RAF), aser Army dena joint team kati Hengjang Kuki village chief aser Leimakhong Area Protection Committee (LAPC) chairman Kammang Lhouvum (65) den Khunkho Kuki yimtsüing nungi Pagin Hangshing (30) na puogo ta Manipur Police-i ashi.

Nisung telok kati Kanto Sabal nung mi senoktsüba dak sendakba nung tenati shilem agiba atema apu. Ketdangsürtemi maneni tangartem maitsü

jangjatsü aser aputsü atema bushitepdar ta police-isa ashi.

July 11 nü Leimakhong Chingmang aser Kanto Sabal amakba ya tesempatsü mapa ka liasü. Iba tatalokba nung Naga aser Meitei nungeri azüingteta yutsür aliba ki trok dak tenük yoka mi senoktsü ta FNCC-i ashi.

Nisung telok jagi Cornerstone Mission School aser Hope International School kakkoka atu, auya aser atsünga agi. Hope International School founder & principal Dr Manu tepsetba sülen anogo ishika lir iba ya inyakogo ta FNCC-isa metetdaksü.

Leimakhong nung Army indang 57 Mountain Division headquarters anasa lir aser Central Armed Police Forces o Punjab Regiment lia iba mapa inyakdaksüba atema ashishir. Iba tatalokba ajanga sorkari law & order mapa shitak meinyaktetba sayur ta FNCC-isa aitsüogo.

FNCC-isa Manipur sorkar, Union Ministry of Home Affairs aser security agencies dang tensa azüoktsü aser kin ajak kümzüka ayuba den ozüing alema inyakertem pua merenshitsü takhangba agütsüogo.

Kangpokpi nung aluyimer ka khaset

Imphal, July 12, 2026 (Agencies): Manipur kübok Kangpokpi district nung Honibarnü arishi küm 53 tain aluyimer ka khasetba osang ketdangsürtemi metetdaksüogo.

Iba nisung ya Govajang nunger Haolal Singait ta jangjaogo. Haolal ya pa kinungtsü Nemneikim Singait

den külemi alu mapa inyaka lia yashi nikongdang 4:00 ako meta nisung kari injang khaloktsüdang khaset. Ajisüaka pa kinungtsüba iba lendong nungi jenbuogo.

Yimdaklirtemi ashiba agi parnoki injang 20 rounds shi angashi aser security forces iba tesem tonga ao.

AOC-in-C, EAC-i HQ IGAR (N) semdang



Dimapur, July 12, 2026 (TYO): Air Marshal Inderpal Singh Walia, AVSM, VM, Air Officer Commanding-in-Chief (AOC-in-C), Eastern Air Command-i July 12, 2026 nü Headquarters Inspector General Assam Rifles (North), Kohima, Nagaland semdangogo.

Iba mapang Air Marshal-i Kohima War Cemetery nung narojung ka yuja linük tenzüka nung noktangdang taküm

bendanga agütsürtem tushio. Air Marshal Walia-i HQ IGAR (N) semdang aser idangji North Eastern Region nung security tensa aser maparen inyaka aruba osang lemsatsep. Air Marshal-isa ketdangsürtem aser sepaitem den ajurutepa sensaksema liasü.

Pai semdangba ajanga Indian Air Force, Indian Army aser Assam Rifles tsüingda tesentaktep tajung yur inyaksangshia aruba kuli agütsür.

Dimapur kiyong aika nung power supply mali timtemer



July 12, 2026 aonung Supermarket sub-station-i transformer ka bener arudang agiba noksa ka angur.

Dimapur, July 12, 2026 (TYO): Dimapur nung Supermarket sub-station nung aliba transformer nung timtem tulu ka adokba ajanga Honibar nungi kiyong aika nung electricity mali lir.

July 11, 2026 anepdang Supermarket sub-station nung timtem adokba ajanga Half Nagarjan, Netaji colony, Police colony, Bank colony, Ura Villa, Circuit House area aser Supermarket (Naga Shopping Arcade) area kongshia lir.

Power department-i tekaratiba nung supply agütsütsü meranga inyakdar anungji nübortemi

kodamasüba timtem angateta aremzüka atatsü aser maparen nung amaliteptsü mepishir ta Er. Lhuyoyi-i sangdong ka nung metetdaksüogo.

Osang angazükba agi Department ket nung 10 MVA transformer mali aser Central Store nung 5 MVA transformer dang ka lir.

Iba jagi department-i tanga sub-station ka nungi 10 MVA transformer agiener idakji 5 MVA transformer melenzüksü aser Supermarket sub-station-i 10 MVA unit belenogo.

Tanep züngia nungi mapa

tenzük saka sub-station temesü asüba den transformer kanga taret asüba agi mapang kanga agir ta osang angazüker.

Tanga sub-station nungi transformer agienba sülen 5 MVA unit tamasa amenokba sülen ang 10 MVA transformer ji Supermarket sub-station-i bener aruogo saka power supply taonungbo magütsütettsü ta angazüker.

Supermarket sub-station nung transformer raksaba ya overloading agi masü saka oset tejen ajanga asütsü akok ta ketdangsür kati ashi.

District 4 nung ghonda 3 power supply malitsü

Külen, Power Department Transmission Division-i July 13 anepdang ghonda asem tashi Dimapur, Chümoukedima, Peren aser Niuland district tem nung power supply malitsü osang metetdaksüogo.

132kV Nagarjan sub-station nung 132kV isolators yanglushitsü atema asüingnep 5:30 ako nungi 8:30 ako tashi ghonda asem district pezü nung power supply malitsü ta Executive Engineer Er. SI Asangba Tikhir-i sangdong ka nung ashi.

District pezü nem supply power agütsüba 132 kV transmission lines ana- Dimapur PG-Dimapur (NL) - Ckt-I aser Ckt-II yanglushiba ajanga power shibangtsü ta Executive Engineer-isa metetdaksüogo.

TNL-i Liangmai nunger tepseter 2 apuba ashishir

Imphal, July 12, 2026 (TYO): Manipur nung Liangmai Naga civilian trok pur aoba aser tepsetba dak sendakba nung nisung ana apuba atema ashishir aser tena apuba inyakyim ya khenyongi balaka lir ta Tangkhul Naga Long (TNL) nung Working Committee ajanga metetdaksüogo.

Ketdangpurtemi chichiba mapa inyakertem pua arutsü ayongzüker ta TNL-i ashi.

July 10 nü Meitei nunger Pradip aser Leilon Vaiphei village nung alir pa kinungtsü Ayingbi (Mangaih) na apu. Manipur

Police, National Investigation Agency (NIA), aser Central Reserve Police Force (CRPF) joint team kati tena apu.

May 13, 2026 nü Liangmai Naga civilian 18 pur aoba aser iba sülen June 10 nü nisung trok tepseter lia anguba ken o dak sendakba nung apuani na apu.

Public-i nisungpur aoertem aser tepsetertem aputsü atema takhangba agütsüba amadokdaksütsü atema tena apu asütsü ama bilemer ta TNL-i ashi.

Kuki-Zo Council-i civilians pur aoba aser tepsetba atema

yimjak nung tenüing agiogo. Iba tatalokba nung Leilon Vaiphei village chief Lalboi Vaiphei (Khailensang) den yimtsüing nungi tetsürtem aser Kuki National Front-Presidential (KNF-P) züingsemtem dena liasü. Item kuli ya pur aoba sülen chiokertemi kuli agütsüogo saka ozüing amertemi mapa shitak meinyaker ta TNL-isa metetdaksü.

TNL-isa state sorkar aser ozüing amertem dang timi, tashishitsü melii aser ochishia bushisüingdang asütsü ayongzükogo.

E-roll nung tenüing tasen züluoktsü atema talila bendenloker

New Delhi, July 12, 2026 (Agencies): Electoral rolls nung tenüing mezüing atema züluoktsüpurtemi taoba Special Intensive Revision (SIR) exercise nung tsüraburtem indang osang agütsütsüla ta Election Commission-i metetdaksüogo.

Iba ya online voter registration atema mandatory asütsü ta ketdangsürtemi ashi. Iba inyakyim ya Form 6 nung bendenlokogo. Form 6 ya first-

time voters, newly eligible citizens aser deleted electors atema statutory form lir.

Nisungtemi Form 6 nung declaration section magütsü tashi online filing mesütettsü. Iba section nung taoba SIR exercise mapang electoral rolls nung tenüing züluoktsüpur mesüra tsüraburtem lir asü mali ta asüingdang.

ECINET portal nung agüja aliba online Form 6 nung Parts J aser K tsüingda iba declaration

tasen ya enoksema lir. Taoba SIR electoral roll nung applicant tenüing lir mali, tesüiba SIR roll nung tsürabur mesüra tetsütebou nunger tenüing lir mali mesüra tesüiba e-roll nung applicant mesüra tsürabur mali ta asüingdanga lir.

SIR exercise ya West Bengal, Bihar, Kerala aser Tamil Nadu dena state aika nung inyakogo asr tang tanga state aser Union Territory tem nung inyakdar.

LMFN indang Youth Conclave nung Nagaland Angh aden



Dimapur, Chiteni/July 12 (TYO): Linguistic Minority Forum of Nagaland (LMFN)-i July 12, 2026 nü Town Hall, Dimapur nung ayongzükba Youth Conclave cum Cultural Fest 2026 sentong nung Nagaland Angh Nand Kishore Yadav tongti tesemdang ama dena liasü.

Pai iba sentong nung jembidang, State nung sobaliba balala benjongtsü asoshi iba ya tetetzü tajung akaba sapang lir aser iba ya ajanga kin balala tsüngta tesendaktep tali ajungkettsür, ta ashi aser sentong ayonger dang pelaba lemsatepa liasü.

Dimapur ya Nagaland asoshi süngkum amai lir, kong sobaliba, oshioben aser yimsü

balala meyokteper alir aser itemji ajanga maneni nübur tesendaktep tashi itdaksür, ta pai ashi.

State nung aliba non-Naga communities tem külemi lungjemdaksüba atema Angh-i Linguistic Minority Forum of Nagaland nem tenüngsang agütsü. Parnoki Nagaland rongsenketzüng, shisaluyim aser nüburtem sunepa aliba nung shilem agiba asoshi pelaba lemsatep aser iba ama ajak lungjemer inyakba ajaga kati ka den telungjem aser yimjung nung alitsü tanüla adokdaksür, ta ashi.

Angh-i lanurtem den jembidang parnokji pei senmang nung kiburtem aser tarutsü Nagaland yanglutsüpurtem lir ta

ashi.

Pai lanurtem dang shisatsü, skills aser entrepreneurship tangatetba nung temelenshi agizüka khuret angatetba lenir akumtsü ajungshia liasü aser maongka kisüng mebushie nübur ajangzüktsü atema maongka yanglutsü ayongzük.

Pei maitsü ya telemsa adokdaksür masü saka telungjem adokdaksür südaksütsüla, ta pai ashi aser kin ajunga dang kati ka dang temeim sayua, maparen tasen apiteta aser kati ka akumtsüboa külemi inyaksü ayongzüka liasü.

Paisa oshioben balala süaka nübur ajunga lungjemer inyakba ajanga Dimapur aser Nagaland terenlok alitsü ta ashi.

CPO Medziphema Circle-i aitsür

Dimapur, Chiteni/July 12 (TYO): Medziphema Town Ward-9 nung Maova yimtsüng nungi Pauminlun Gangte (Retired Army Personel), S/o Lenthang Gangte ajanga July 7, 2026 nü tanur ka dak tim masüba mapa inyakba khukhua aitsür, ta Chakhroma Public Organisation, Medziphema Circle sangdong ka nung ashi.

Iba ama taochi maka aser nisung masü ama mapa tamajung inyakba ya tai maket tanur ka temeden anema lir aser tejakleni aoba lokti nung talidak maka.

Iba timtem ajurur aliba tanur aser kinunger den onok

nokdaka lir aser tanur taneptsü angutsü atema sarasademtsür, ta CPO Medziphema Circle sangdong nung ashi.

Onoki ozüng amshirtem aser tapet ketdangsürtem dang tekeraba aser ochi nung kanga junga bushisüngdanga aibelener nem ozüng agi mela aliba ama tapet temerenshi agütsütsü ayongzük. Menüngdakba nung menua melie ochi obendang agütsütsüla, ta ashi.

Kasa mapang ketdangsürtem dang tanur nem medical aser psychological teyari shidak agüja ozüng inyakyim ajanga kumzüka ayutsü ajungshir, ta ashi.

Ramen agi meneper 6 aser JE agi meneper ka liasü

Dimapur, Chiteni/July 12 (TYO): Taküm Dimapur nung ramen agi meneper nisung trok aser Japanese Encephalitis (JE) agi meneper ka liasü. Ajisüaka cases ajunga tangalen nungi aruba liasü, ta Heanglih T. Konyak, District Vector Borne Disease Consultant (DVBDC), Dimapur ajanga metetdaksü.

Kasa mapang January nungi tanü tashi Dimapur, Chümoukedima aser Niuland districts tem nung dengue cases putetba osang mali, ta ashi.

Dengue cases südi ta temulung melemba bilemba tendangtsü asoshi private healthcare facilities nung Rapid

Diagnostic Test (RDT) amshir. Shiranger dak positive putetra, rample ya ELISA testb ajanga jangjatsü atema District Hospital Dimapur dangi yoker, ta lai ashi.

Dengue adokdaksüba Aedes merila rizükba tesemtem azüoktsü mechi urban wards nung item tesemtem ajemdaksütsü mapa tem mapang shia inyaker, ta ashi.

JE dak sendakba nung department-i tzülu aser tzü mesüba lenmangtem nung mesen azüokba nung rangloker, ta lai ashi aser nüburtem dang temang ronga yimya balala agi shirangba mapang tendangtsü ayongzüka liasü.

NPF Central Women Wing-i seminar ayongzük



NPF Central Women Wing-i seminar ayongzükba aliba mapang nung tangokba noksa angur.

Dimapur, Chiteni/July 12 (TYO): Naga People's Front (NPF), Central Women Wing ajanga NPF Central Headquarters, Kohima nung Hokulbarnü "Safe Spaces, Strong Voices: Navigating Politics as Women" onük nung ajemdaker "Empowering Women in Politics and Leadership" seminar ka ayongzüka liasü, kong Deputy Chief Minister, T.R. Zeliang-i iba ama mapang shidak nung tingtipang sentong ayongzükba aser tanü lokti den apet omen shimba atema NPF Central Women Wing nem tenüngsang agüja liasü.

Iba omen yagi tongmelang saka tashi tulu aliba ochi sayur, aser ibaji kodang tetsürtem kumzüka lir ama bilemer, akumtsübor aser yarir, idangji parnokki temulung ulushir nübur

asoshi shilem tajung agir ta ashi. 'Safe spaces' ya pei meketa aliba kisüng masü, yangji tetsür akumtsüboa amshiba aser tetsübo makai pei tangatetba lemsatepba, shisatsü tasen lemsatepba tebendang makai tajungtiba agizükba aser kati ka akumtsüboa kasa maongka agüja lenirtem anitetba dena lir, ta pai ashi.

Tetsübo maliba tesem agütsüba ajanga dang tashi tait ola adoker aser item ola yagi nübur sentong yanglushitsür, telemtetba agiba nung kongshir aser terenlok tajung asoshi tashi tait hadir akumer, ta T.R. Zeliang-i ashi.

Ajisüaka tanü India indang Parliament nung reprangdangra, Lok Sabha nung menden 543 aliba nungi tetsür MP 74 mesüra shilem 13 shi lir aser Rajya Sabha

nung tetsür MPs 42 lir, koba shilem 17 shi lir, ta ashi.

Iba ya akhi mapang den medemdangra, terenlok aliba sayur aser ano tali inyaksü nüngdaker ta angatetdaksür.

Nagaland nunga kasa tebilemstü liasü aser 2023 election matong tashi Nagaland Legislative Assembly nung tetsür züngsem kata meliasü, ta ashi.

Asen state nung küm aika Urban Local Bodies nung tetsür asoshi menden wazüka ayutsü indang jembia aru aser yangji customary inyakyim aser constitution tsütsü tebilemdangtsü dena liasü aser Article 371A kübok asen temeden yimya balala nung angateta amshiba liasü.

Iba onük jembitsü kanga tasak liasü, saka sensaksemba, shisa agitepba

aser lulaa maoba aser Apex Court teka sangshiba ajanga Nagaland nung tebenjatiba ken o tangatetep kati aru, ta Dy. CM Zeliang-i ashi.

Tetsür asoshi menden wazüka yutsütsü indang jembidang asenoki küm 20 dak tema amajok nung indokogo, anungji terenlok mapa aika samadok. Anungji asenoki reservation aser Article 371A ya kanga kumdanga amshitsüla, ta pai ashi.

Naga tsürtem kodanga lenisüba menden nungi pila meliasü. Putu aika asen kibong nung parnok tongtirtet ama aru, asen sobaliba nung kibur ama, arogo nung shilem tajung agia aser anibelem mesasai yimjung asoshi jembia aru. Naga tsürtem yimya agi meranga inyakerkem lir. Nenoki shisaluyim aser linük nung

mapa balala nung amokbanger inyaka arur, ta pai ashi.

State aser linük nung yimten aser terenlok maparen nung asen tetsür temia tangar ama inyaktettsü. Naga Mothers Association ama lokti tentet balalai asen puti otsü nung mapang tamajungdang tasü ita yimjung asoshi bendanga agütsür inyakba asenoki nguogo. Aser parnokki yamaji inyakba ajanga lenir ya elected office kisüng nung masü saka tenzükba, temeim aser nüburtem lungjemdaksütsü tashi aliba ajanga sayur, ta Dy. CM T.R. Zeliang-i ashi.

Kibong temia pei jalatem ajungmesotsüla aser civil society temi amokmeren yimya anema nokdaksüla, aser tongtipangsa tetsür tem kati ka yaria aser ajungmesoteptsüla, ta pai ashi.



July 12, 2026 nü Jammu nung aliba Maharaja Hari Singh Park nung Jammu & Kashmir Chief Minister, Omar Abdullah 'Delhi Chalo- We Want Our Statehood' rally nung adenba noksa nung angur.

Hizbul Mijahideen kiralongrar ka anema Red Corner Notice agütsü

Jammu, July 12 (Agencies): 2013 kum kiralongrartemi Tarzoo (Hygam) amakba bushisüngdangba dak sendakba nung Kashmir nung State Investigation Agency (SIA)-i Hizbul Mujahideen nungi kiralongrar, Imtiyaz Ahmad Kandoo anema Interpol Red Corner Notice (RCN) agütsüo.

Jammu & Kashmir nung police pezü tepsetba tatalokba ya pai asalentonga inyakba lir, ta pa nem tai tonglokja lir.

Interpol ajanga agütsüba Red Corner Notice ajanga züngsem linüktem nung aliba ozüing benokba agency temi pa kong aliar bushitsü, aputsü aser India-i anir arutsü atema inyaktsü. Imtiyaz Kandoo ya tang Pakistan nung jenoka alitsü südi ta bilemer.

2013 kum April 26 anogo nung Jammu & Kashmir nung

Sopore kübok Peer Mohalla nung kiralongrartemi police party ka amakba mapang nung Jammu & Kashmir Police pezü asü.

Iba ken o ya mezüingbo Tarzoo Police Station nung benoka liasü, ajisüaka jungjunga bushisüngdangtsü atema 2024 kum iba ken o ya Kashmir nung State Investigation Agency (SIA) nem agüja liasü.

SIA-i ashiba agi, bushisüngdangba mapang nung parnoki kuli balala bendenba den külemi tenük kuli alirtem kuli bendena liasü. Kuli tasen nung ajemdaker 2024 kum July ita nung tai tonglokja alir nisung trok anema SIA-i tai tongloktsüba ken o benoka liasü.

Bushisüngdangba mapang nung tai tonglokja alir ana-Handwara nungi Tariq Ahmad Mir aser Sopore nungi Qayoom Najar nabo security sepaitem

den raradang khasetogo. Tanüingba nisung asem- Javid Ahmad Mattoo, Rouf Najar aser Ahmadullah Malla nunger pua parnok anema ken o angadangrar.

SIA-i, Imtiyaz Ahmad Kandoo dang Fayaz aser Sajad taka ajar, aser iba ken o nung tai tonglokja alir tongtiji pa lir, ta metetdaksü.

Kandoo ya Sopore kübok Kraltang nungi lir aser 2010 kum nungi pai Hizbul Mujahideen den külemi inyaker aser 2022 kum October ita nung India sorkari pa ya 'kiralongrar' ta sangdonga liasü.

SIA-isa ashiba agi, Kandoo-i kiralongra dak sendakba ken o 10 nunga shilem agia lir; nisung tepsetba, sepaitem amakba, raraba hadir shibelenba aser temesepba mozü shibelenba ken otem nunga pai shilem agia lir.

Oman nung rong ka amak; India nunger 10 kumzük aser ka samaogo

New Delhi, July 12 (Agencies): Amongnü anepang Oman tzüyim nung commercial rong GFS Galaxy amakba sülen India nunger 10 kumzük aser ka samaogo, ta Ministry of External Affairs (MEA)-i metetdaksü.

"Rong nung alir India nunger 11 nungi tang tashi nung parnok 10 bo kumzükogo aser ka samaogo," ta MEA-i metetdaksü.

Oman nung aliba India Embassy-i iba tensa ya asadangrar aser kumzükba maparen nung Oman nunger

ketdangsertem den yaritepdar, ta MEA-i metetdaksü.

Ano tanga osang ka nung Iran-i, ozüing alema tzüyim lenmang ka nung rong senzüba agi parnoki tekümdangtsü metetdakja amak, ta metetdaksü.

Iba tatalokba aija India-i, region nung civilian rong aser kiojen amakba ya tangsa anentsüla, ta metetdaksü.

MEA-i, "Oman ketdangsertemi yariba atema parnok dang pelar. Iba denji külemi onoki tensa tamajungba makümtsü atema inyaktsü

nenshia metetdaksü. Region nung tensa süngjemtsü aser yimjung alitsü atema tang tejembidak ken o tembanga jembitsüla," ta ashi.

"Commercial rong aser civilian kiojentem amakba ya tangsa anenadoktsüla aser International ozüing benshia region nung aliba international tzüyim lenmang nung kecha tetsükdaksü makai rong ajak s a d e m s a d e m a senzüdaksütsüla," ta Ministry of External Affairs (MEA)-isa metetdaksü.



New Delhi, July 12, 2026: Climate activist Sonam Wangchuk-i Jantar Mantar nung anogo 15buba lumia longkak aitba anogo nung doctor temi pa temang tendangba noksa nung angur. Kasa noksa nung Cockroach Janata Party (CJP) t e n t e t s a n g , Abhijeet Dipke-a angur.

Centre sorkari July 19 nü party ajak senden ka ayongzükur

New Delhi, Chiteni/July 12 (Agencies): Tzüngluruwa mongpu Parliament senden tenzüksü anogo ka jakdang Centre sorkari July 19 nü party ajak senden ka ayongzükogo.

Ketdangsertemi ashiba agi, iba senden nungji sorkari taruba Parliament nung benoktsü aliba tongtibang onüktem metetdaksütsü.

Ano külen, taruba Parliament senden nung opposition party temi NEET-UG paper leak asüba ken o aser Parliament nung defence minister Rajnath Singh-i Operation Sindoor mapang nung India nunger sepai kata masü ta jembiba anema ola adoktsü.

Parliamentary Affair Minister Kiren Rijiju-i X ajanga, "India sorkar, Tir Droupadi Murmu-i tzüngluruwa mongpu Parliament senden House anaprongla nung ayongzüksü atema agizükogo. Iba senden ya July 20, 2026 nü tenzüksü aser August 13, 2026 nü tembangtsü. Iba senden nung linük atema tongtibang onüktem nung o enteptsü, o lemteptsü aser

telemtetbatem agitsü," ta metetdaksü.

Joint Parliamentary Committee (JPC)-i 130th Constitution Amendment Bill asadangrar aser iba report ji July 17 nü metetdaksütsü.

Iba Bill kübok ozüing alema aibelenba ken o tulu dak sendakba nung Ato kilonser, Chief Ministers, Union Ministers mesüra state minister tem anogo 30 tashi judicial ket nung pua yura menden nungi anentsütsü.

Tang opposition party tem aika jenjang mejungi lir, talisa assembly elections nung tamakok anguba sülen Trinamool Congress nungi MP 20-i National Citizens Party of India nung denogo aser TMC MP asemi Rajya Sabha menden toktsür BJP nung denogo.

Iba dak alia Shiv Sena (UBT) nunga telemsa adoka Lok Sabha nung MP troki Maharashtra Deputy Chief Minister Eknath Shinde-i aniba Shiv Sena telok nung denogo.

Rajya Sabha nung AAP MP tenetia party toktsür BJP nung denogo.



Shimla, July 12, 2026: Himachal Pradesh yimtiba, Shimla nung aonung piyong tzünglu aruba sülen anentsüh alua aliba noksa nung angur.

Uttar Pradesh nungsüngdong crore 35 dak tali temogo

New Delhi, July 12 (Agencies): Amongnü Uttar Pradesh Chief Minister Yogi Adityanath-i, 'Maha Vriksharopan 2026' kübok state tesem balala nung süngdong crore 35 dak tali atemtsü, aser iba ya "Ek Ped Maa Ke Naam" den sendaktepa lir, ta metetdaksü.

'Ek Ped Maa Ke Naam' campaign kübok ayongzükba sentong ka nung jembidang Yogi-i, "Iba ya Tetsü Alima dang pelaba sayuba mapatong ka lir. Lai ajak nem environment tajung agütsür aser renloktsü atema maangka aika agütsür. Asenok taküm alitsü atema lai tsük adokdaksür aser süngjanglijang tangdaksür. Asenok ajemtsü atema lai tzi agütsür aser asenok nüngdak ajak peritsür," ta metetdaksü.

Amongnü anepdang 'Ek Ped Maa Ke Naam' mapatong kübok Yogi-i süngdong ka atem.

Atal Bihari Vajpayee Medical University nung Maha Vriksharopan 2026 tenzüksü

jelia Uttar Pradesh Deputy Chief Minister Brajesh Pathak-ia süngdong ka atem.

Pathak-i, linük nung arem litsü tuluba kümdaktsüba tsütsü Uttar Pradesh ya temaba jenjang nung lir, ta metetdaksü.

"Tanü iba campaign kübok state tesem ajaklen anepdang 7:00 ako nungi aonung 7:00 ako tashi nung süngdong crore 35 atemtsü. 2017 kum nungi tenzüka tanü tashi nung kum 9 tsüingda Chief Minister Yogi lenisüba kübok asen sorkari state tem ajaklen süngdong atemba tsütsü alizüing ka tongtetogo. Linük jenjang nung arem mesüra süngdonglidong indang kodang jembidir asenok temaba jenjang nung lir," ta pai metetdaksü.

Osangbenertem den jembidang Pathak-i, state nung nisung ajaki süngdong kaka atemtsüla, kechiyong 'Ek Ped Maa Ke Naam' mapatong ya alima wazüka ayuba dang masü saka tetsütem nem akhüm agütsüba mapatong ka lir, ta ashi.



TIR YIMYIM YIMOBILEM (EDITORIAL)

DIMAPUR MONDAY, JULY (CHITENI) 13, 2026

Timtem aser tamakok aremtettsüla

Tang ya Nagaland nung yimten tsütsü nübortem terata lenjem tuluka nung nokdaka lir. Iba yimten terata lenjem nungi küleni odi asünung BJP telok den adener asütsü, ano küleni odi asünung Rio-i aniba NPF telok nung adener asütsü aser ano tangalen kati odi asünung Congress telok nung adener asütsü. Ajisüaka, Naga nung aikati lenjem nung jagi lenmang asemprongla jagi mouner. Aji oda, Naga nung aikati BJP telok nung medener kechiyong parnok Khristan yimsü anemer, ano Rio-i aniba NPF nunga medener, kechiyong Rio leniba nung Nagaland tajungba küma renlokba mangur aser yimten anaji toktsür Congress nunga medener, kechiyong India nung Congress teloki mapang tatsükabo yimsü süa mangur. Iba ama mapang ka nung, küm pungo jakdang tentetba yimten telok Rising People's Party (RPP) mali küma NPF nung adenbajia Naga nung asoshibo osang tajung kabo masü. Atangji, RPP telok ya Rio-i aniba government inyakyim nung temulung masüba agi, Naga nung asoshi Rio-i aniba government melena yimten tajungba ka akümtsü nükjiding aser temulungtetba nung akümba telok ka liasü. Iba jagi, parnok telok akümba anogo nungi Rio-i aniba government nung ochimashi inyakba mapatem anema ola adoka tenzük. Aji oda, mapang kabo Congress telok dena longjemer yimten nung shilem agiba nguogo. Atangji, Nagaland ama ka nung yimten telok, political party, tasen ka tenzüker tang taintemi aniba telok anema nokdaksüba kanga mapa tasak ka lir, kechiyong Nagaland nungbo nübortem dak yimten tangatetba mali, anungji shibai angati sen aika agütsür aser shibai tatidang kecha magii government mapa agütsür ta asüba nung dang yimten nung shilem agir. Aji oda, Nagaland nungbo nübortemi lenmang tamajung nung jajatsüa tarem, light maruyonga tarem, government mozü ki junga mereprangyonga kecha masü, government school-tema anepalu masüyonga ojang, aluyimba nung aluyimertem meyariyonga tarem aser Naga yimten tebilemtsü agi lanurtem tagidak maka küma omayonga kecha masü. Item timtem takoksa ajakji mapa meinyak ser sen tera ngura ojang aser nisung ka government mapai yoktetra ojang ta asüba tangatetba nung asen nisungtemi alar jenjangi alutsüa mulunga lir. Iba jagi tanü Naga nung ajak government nung alir takar kar kübok pei lima nunga sensoa masü amai alar jenjang nung lidagi. Aji oda, takarsa asüyonga kecha meinyak ser government nung shilem agiba ajanga takar akümba jagi Nagaland nung nübortembo tali tesensakba akümer ta nübortemi mereprangteter, merajemer aser mangateter. Iba ama nübortemi nüchi kümdakja anitettsü asoshi mulungtetertemi tamasayongi timtem, tamakok aser maksü aremtsü ta mulungteter apusotsüla. Aji oda, mangatetba nübortem, pei tenüng amshia tangar takar kümdaksüba agi peibo teboka mesüngtet timatemer ser nung, item ochimashi mapatem anema ola adoktsü melen, itemjiang pei taküm aser kibong nung kibur kümdaksür meshimetsüa alitsüang shimtetba purtem anitettsüba, atangji, tasüa aremtsüla. Asenok Khristan purtemisa iba teinyaktsü khuretji tangatetba asütsüla, kechiyong asenok Laishiba nung Mosa nungi Yisu tashi otsüji masa-mangatet, nüchi ser tamachi aser alar kümer alirtem nem nüchi aser tekümtet agütsütsü asoshi timtem, takoksa ase tasü tashi arema lenisüba agütsüba otsütem lir. Ashiko, Nagaland nung RPP lenirtem dak iba tashiji timtem takoksa aremtettsüa tangatetba aser temulungtetba mali asü südi. Atangji, yimten telok tasen ka tentetba nükjiding government akümtsü asoshi dangbo masütsüla mesüra yimten telok nung mendenpur akümtsü asoshia masütsüla, saka nübortem asoshi timtem takoksa arema temelenshi tajung ka, kobai ochimashi mapatem atsüngdoker ochi yimten yimsüsüba bener arua nübortem nüchi kümdaksür, iba temelenshiji bener arutsür asütsüla. Ajisüaka, tang RPP tenzükertemi timtem aser tamakok marem parnok kanga mejungi aitsür telok nungang oa adenbaji, parnok asoshi dang masü saka Nagaland nung alir ajak asoshi election nung anguba tamakok aser takoksa dang nungi tuluba asütsü. Atangji, tang tangbo, Nagaland nung alir Naga nungertem asoshibo iba amaji ano aiben ataloktsü langa lir.

OLEMSABANG

Mapa tajung inyaker alima nung taso shizüka alitsü

~ L.Kika Pongener

Alima nung nisung ajaki taküm junga, anisungzüka, jangradema linur; saka telinur ajakibo iba maongkaji monguteter; oda aika rongnung kar dang taso shizüka alir. Tsüngrem o-i ashir, "Kibuba dak amangang aser tajung inyakang; Aji sura na ali nung taso shia alitsü" (T.Ken-37:3). Tsüngrem o-i ashibaji...Mapa tajung inyaker alima nung taso shizüka lidaktsütsü. Shirnoki mapa tajung inyaker; ochishia alir aser taküm asüngteta alir; parnokji chirnur aser semchi-semnur tajung moatsütsü. Atangji, mapa tajung inyaker, ochishia, asüngteta, meshiteta alirtem; arishi küm nung tain kümaka tenuk, tepo, tenarong, tokolok, shisatsü ajak shidak lidaktsütsü aser chiyungtsü takü, tasen, tanang ajak shidak chiteta lidaktsütsü. Ano Tsüngrem o-i ashir, "Küpu apuba kolakji sentsüwangshi korang; Aji temeshiba taküm ajanga dang ajangzüker" (A.Shin-16:31). Tokolak nung küpu pua arishia alitsüba odangbo malir; saka ibaji temeshiba taküm ajanga dang ajangzüker. Mapa tajung inyaker, ochishia, asüngteta, meshiteta alirtemi dang küpu pua arishia alitsüba ajangzüker. Aji oda, mapa tajung inyaka, taküm asüngteta meshiteta alirtemji; parnok dang taso shizüka alitsüba masü; parnok dak jakzüka chirnur aser semchi-semnur dena tashitemeteter, kenshi-oshir, alimai züngshitsüa lennir tajung, watsü-wabong tajung sotetdaksütsü. "Kibuba tsüngken tsübuba nisung tepelatsü. Pa metsü alima nung tashi tulu alitsü. Azükaro aser rongsen par kidang alitsü" (T.Ken-112:1-4). Atangji, taküm asüngteta, meshiteta aser mapa tajung inyaka alirtem taso shizüka alitsü.

Shirnoki mapa tajung inyaker, ochishia aser indang-indanga alir parnokji teti pelaa alitsü. Aser chiyungtsü sungolemba, etsük-ontsü aser ngashi-lon ka dang suaka; pangnang-pangnanga chiyunga, koleni onur ilenjagi oteta; kechi inyaknur inyakteta arishia lidaktsütsü. Tsüngrem o-i ashir, "Parnoki ki sua yangji alitsü, parnoki tsükmenatsü lu ayimtsü aser item sungjang achitsü. Tangar alitsü ki parnok meyanglutsü, tangar achitsü parnok metsünutsü aser sungdong arishi anogo ama kü nubur arishi alitsü. Angazükba agi sungdong ya arishi küm talangka alir. Aji oda, Tsüngrem mulung achitsüa taküm asüngteta litetertem sungdong arishi ama lidaktsütsü ta ashir. Amajok nung parnok mebelemtsü mesura tesamatsü asoshi chirnur mesotentsü; kechiyong parnok Kibubai moatsür kin lir" (Isaia-65:21-23). Tanü putu nung nisung karbo ki tulu tajung atongtepa yanglua yur iba ki nungji melishi; tangar kar keti aoba nguogo. Timtema belemseta yanglur; iba ki nungji melishi tangar kar-ang jangradema aliba denjia aruogo. Chiyungtsü tajung ki sunga nangdaka yur mechitettsüa tashitak tapu-tapu aketba temeimtsü-ka nisung karbo nguogo. Ashiko, kanga-sa tesasatsü-ka, kibong kar nungpo jala-jabaso tajung; temeimtsü-ka aser tapayutsü-ka asen magishitsüa asütsü. "Nisung shibai Kibuba tsüngken tsübur, shibai pa lenmang nung jajar pa temoatsü. Kechiyong ne ket agi züsentetba nai achitsü; Na tepelatsü alitsü aser junga alitsü. Ne kinungtsüji tejang atangba tsükmenatsüdong ama alitsü; Ne chirtem ner langpang meketa olive sungdong ama alitsü" (T.Ken-128:1-3).

Aji oda, mapa tajung ya tapu ana lir; mapa kar nisung tsüngdangbo shitak/ochi amai....Saka Tsüngrem tsüngdangbo meshitak mapa kar lir. Aiben asen mimchiri nisung tsüngdangbo shitak; saka Tsüngrem tsüngdangbo meshitak; iba ama mapa-jiang teimba inyaker. Atangji, asen mimchiri asen taginuba kar ataloknudang; mesura mapa kar nung takok ngunudang; nutsüng-nubu aser lokti tashi nung temulung ulur; takaba rongsen dak nendaker, tashiyim agi (Might is right) akoker. Ajiser, ibaji nisung tsüngdangbo shitak aser temeden amai bilemer; saka Tsüngrem tsüngdangbo temeden mangutsü. Atangji, asen mimchiri sen agi alizüker; tiyazü kuli agi koker; atoksar sernung madoksa kümtsür; shitak sernung meshitak kümtsür aser atsüzüka yutsür. Aji oda, iba ama tashiyim agi akokbaji ashi-külak mapa asütsü....Aser iba ama ashi-külak mapa inyakbaji nisungibo mangutsü akok....Saka Tsüngrem-ibo ngudar. Shirnoki iba ama tasa tamajung asar aser iba ama mapa tamajung ashi-külaka inyaker; Tsüngrem tsüngdangbo mejenbuttsü. Tsüngrem o-i ashir..."Tamajunger linuk nungi leptoktsü; aser ashikülaker tera nungi atsütoktsü" (A.Shin-2:22). Ashiko, karbo kanga tapayutsü-ka aser kanga-sa tesasatsü-ka Tsüngremi anojungi leptoktsü. Anungji nisungi nguaka aser monguaka indang-ingdanga mapa tajung inyaktsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Colorado Springs nung 'Baptize COS' sentong ayongzüka agitsü



Colorado Springs, Chiteni/ July 12 (Agencies): August 15, 2026 nü Pikes Peak region nung aliba Arogo balala nungi Khristanem noklang aika Colorado Springs nung adenshia 'Baptize COS' sentong nung adentsü.

'Yisu Khrista aser osangtajung' nung ajemdaker iba sentong akatsü.

August 15 nikongdang Tejon Procession tenzüka tamangertemi yimdong süa jajatsü aser tesüsa Acacia Park nung tekülem sentong ka agia tembangtsü.

Iba sentong nungji Khrista osangtajung sayutsüngitsü aser tamangertemi yimjak nung pei tamang sangdonga baptitsü.

Baptize COS ayongzüksang aser Colorado Springs nung aliba The Jesus Church nung pastor, Nick Yaksich-i, "Colorado Springs ya kanga tongtimbang mapang ka nung lir, ta ni amanger. Mapang talangka asen yimti nung Arogo teinyaktsü mapa tesülen kanga atsüngzüka liasü. Ajisüaka

Baptize COS ya ajanga iba yimti nung temelenshi bener tulu bener arutsütsü aser Arogotem longjemdaksütsü atema maongka agütsütsü ta ni amanger," ta metetdaksü.

Iba yimti nung lokti senden aika yimtenren mesüra tangatetba balala dak sendakba nung ayongzüka agir, ajisüaka Baptize COS yabo yimyim ka kübok Khristanem longjemtsü atema lir, ta pastor-isa metetdaksü.

"Arogoi tongmelang yimyim ka nung longjemtsü. Yimtenren yimyim ka ama masü saka Yisu Khrista aser osangtajung yimyim kübok longjemtsü," ta Yaksich-i ashi.

"Alima nung osang tajungtibaji asenok nem agütsüogo- Tsüngremi alima oda meim nung Pa shi aküm aser asen menen alangzüksü atema Pa taküm bendanga agütsü, tasü madak takok angu, leper nungi saak, kodaki atu aser Kibuba tenüng nung ayimdenener ajak kümzüksü. Osangtajung proktsü atema

Arogo nem nungloksü, anungji onoki Colorado Springs tesem ajaklen tasü itta Khrista osangtajung sangdongtsü," ta pai metetdaksü.

Sentong ayongzükertemi ashiba agi, Baptize COS nung Pikes Peak region nung aliba Arogo balala nungi nisung noklang aika adenshia shilem agitsü imlar.

Iba sentong nung tekülem agitsü, sayutsüngitsü, Khrista osangtajung sangdongtsü aser nikongdang piyong baptitsü.

Iba sentong ya Khristanem telongjem sayatsü nükjidong nung ayongzüker, iba denji külemi Khrista magizüki alirtem ajak iba sentong nung adentsü jaoker.

Sentong ayongzükertemi Tejon Procession nung shilem agitsü aser Yisu Khrista dak amangba yimjak nung sayaa baptitsü ayongzükogo.

Iba sentong nung adentsü janrartem dang baptizecos.com nung jelia register asütsü metetdaksüogo.

ANOGO ABEN TSÜNGREM DEN

Khristan libaliro tetenzükdak Mathi 4: 18-25.

Meimchir temetetba nung Nazaret nunger Yisui yaribaji meimchiri rasaa ashitsüba atema yari. Asenoki Yisu indang bilembaji Talangzüker aser Kümtetdakba ta angatetba nung dang atemer. Pa aji liasü, saka ano iba dang tali.

Tanga balaka rongnung, Yisuji mapang ajak nung liba-liro tesayur tulu ka liasü. Yisui tebilemba ka mesüra tangatetba ka nung dang Pa asoshi aser tanger asoshia tekong meranga mesot, Pai ajak asoshi jakla (morality) nung sot. Yisui ajaba odang lir: "Ni anidakang". Iba tajaba nung tashi angatsü asoshi shidak bilemstsü aser shidak alitsü temeshi tebilemtetba nüngdaker. Iba nung Khristan kati Khristan jakla tashi angur.

Telok nung jenjang akatsü asoshi Yisu sayuba liba-liro yimya ozüngji kija takümi amshitsüla. Alima nung rongsen meshidaki lemsatepba nung ni kechi inyaktsü? Ajemrepa alirtem tsütsü Kü tebilemba kechi? Yisui "Kü sülen anidakang" ta ashiba tetezü kechi?

Item nung shisadangang: mapang agia Mathi 5:1-22 züngang. Iba liba-liro ozüng ner telok nung, ne mapa nung, ner arogo nung aser ner kidang koda amshitsü bilemdangang. Nai iba tesayuba nung alitsü meranger asü?

O Kibuba, ne lemanng Kü dang sayuang, aser ni lenten lemanng nung aniang. T.Ken 27:11 Koba lemanng nung na aotsüla iba lemanngji atema ni ne dang ashitsü aser sayutsü: Ni Kü tenük ne dak yur sayutsüngitsü. T.Ken 32:8.

Ainkar Muhammad nungi jakzüker kati Yisu Khrista agizük



July 12, 2026: Muslim nunger ainkar Muhammad dak nungi jakzüker kati Yisu Khrista agizüka tangbo Yisu sülen anidaker.

Pa ya Islam yimsü tesayur ka aser Imam ka liasü, ajisüaka tesülenbo pai Islam yimsü nung terataba liasü aser lenmang tasen ka bushi.

Thomas Samuel-i Islam yimsü nung ratamata tenzükbä sülen pa melungjang nung minprong kanga liasü aser pai aiben soseta asütsü merang.

CBN News' Radical Revelations podcast nung jembidang Samuel-i, "Ni kü taküm agiadoktsü atema

telemtetba agia liasü," ta ashi.

Ajisüaka aiben soseta asütsü merangbaji pa atema tatembang ka masü liasü. Pai Tsüngrem dang ayimdenba ajanga pa taküm nung temelenshi tulu adok.

"Azü junga mejajatsü atema ni mozü aika achi, aser ni tasür ta ni bilema liasü. Iba mapang nungji mezüng ni Tsüngrem den jembä tenzük. Ni pa dang ni tasür, anungji ni kümzüksü atema langka inyakang ta ni ayimdena liasü," ta Samuel-i ashi.

Ajioda Tsüngremi Samuel-i ayimdenba langzüa pa taküm kümzük.

"Ni kecha masü ama saak. Iba ya ni mozü kanga tali machiba agi asü? mesüra sarasadem langzüba agi? ta ni kü sasa shisadanga liasü," ta pai ashi.

Samuel-i maneni ibaji tendanga ano khen soseta asütsü merang, aser ibaji ajanga pai 'mozü ajema achiba agi masü saka Tsüngremi sarasadem langzüba lir' ta jangjaa liasü.

Iba aonungji Samuel-i sarasademer mejangba sülen pa taküm nung temelenshi tulu adoktsüsa pai pungmang ka pungmanga liasü, iba sülen pai Yisu dak amang tenzük.

"Pungmang nung ni lenmang talangka nung asem-a pungmang. Ni lenmang talangka angu, aser ai keta aliba kongsang aikati ni arishi. Lenmang tatembanglenji kü jakdang tebur ka ni nokdaka angu. Ni pa dang 'yimibilema ni yariang' ta ashi'" ta Samuel-i ashi.

"Ni paji shibaar memetet, anungji Pai Pa teka songla aser kü tapubang nung amer Pa

matsüngdangi atsüer ao," ta paisa metetdaksü.

Samuel-i nisungbaji memetet, ajisüaka nisungba jagibo Samuel meteta liasü. Iba nisungbaji Yisu liasü aser Pai Samuel dang Pa sülen anidakang ta ashi.

Samuel-i, "Iba nisungbaji Yisu lir ta ni tesülen metet. Ni kuli kecha memetet saka pungmang nung Paji Yisu ta ni meteta liasü. Pai kü tenük nung rangloker yamai ashi 'Joko kü sülen anidaksü atema iba ya nü mapang lir' ta ashi," ta metetdaksü.

Samuel-i pa pungmangji kanga shisadang aser Yisu dang atangji nai Nü maitsü tejangja shiang ta mepishia liasü.

"Ni mejangba nungi saak aser ni yamai bilem, 'iba ya mangpu-manglemba lir, mesüra website nung ni langka züngshiba ajanga asütsü südi ta bilem," ta pai ashi.

Samuel-i, "Anungji ni kodaklen rangloker 'iba ya asayamenu ka mesüra aser ni website nung züngshiba ama atangji na Yisu Khrista süra kü dangi ano khen arung, mesüra

ni kodanga na meshisadangtsü' ta sarasadema liasü," ta metetdaksü.

Ajioda maneni Samuel pungmang nung Yisu arua pa dang 'Kü sülen anidaksü atema nü mapang tongogo' ta Ni nü dang mashi asü? ta ashi, ta Samul-i metetdaksü. Samuel atema ibaji teperi liasü.

"Oren balaka nung 'Ni nü dang meshika ma?' ta asübaji ni asenoki kuli ajak liasü. Tsüngremi angashir. Yisu-i angashir, anungji nisungtemi ibaji merangdangtsüla," ta pai ashi.

Yisu-i angashiba dang masü saka Pasasa jungkai adoka sayur, ta shia Samuel-i, "Iba ochi ajanga kü taküm kümzük aser ibaji ajanga Khrista osangtajung mangashidangbapurtem-a kümzüksü akok, ta ashi.

"Asenoki jashia alidang aser teyarir shinga malidang Yiui asen ola angashir. Ibaji ajanga nisung aika, talisa Khrista o s a n g t a j u n g mangashidangbapur aser yimsü alia amangertem matsüngdang Yisui jungkai adoka sayur," ta Samuel-i ashi.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yokshi

(v) nüngsen jembitsüba, tangar mezügmeshia jembitsüba (backbite, belittle, defame)

* Nisung kari lokti nung nung ni yokshia jembiba angashi,

Yokya

(n) ki kilem atongdang ain nung alenlokba süngküm (roofing support bamboo bar)

* Yokya asütsü atema longmi tajung agir.

OLONG PAITEP # 7564

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S _ _ i
9. Nisung rongnung telemasa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

OLONG PAITEP # 7563 TELANGZÜBA**TIPIEN :**

1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.


LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük, 11. Teronem,
12. Sempa, 13. Jahaz.

NAI-A YA METETTER

Rapper aser singer Pitbull den par fans-i Guinness World Record ka yangluogo aser iba ya "largest gathering of people wearing bald caps" lir.

London festival nung BST Hyde Park show nung Pitbull kenten sentong metenzükdang nisung 22,141-i bald cap semer aruba züngteta iba otsü tasen yanglua liasü.

Assam nung health sub-centre shia nung MBBS doctor ka alitsü

Guwahati, July 12, 2026

(Agencies): Assam sorkari health sector nung mapa tasen 33,240 adokba osang metetdaksüogo aser iba ya state putiotsü nung healthcare expansion initiatives tulutiba rongnung ka asütsü.

Assam sorkari Health Sub-

Centre shia nung MBBS doctor kabosa mapa lezmüksütsü sentong lir aser ya linük nung mezüngbuba asütsü.

Finance Minister Jayanta Malla Baruah-i Assembly nung Assam Budget 2026-27 benokdang Sub-Centre shia nung qualified MBBS doctor ka

lemzüksütsü ta ashi.

Assam tesem balala nung primary healthcare services tajungba akümtsü asoshi Sub-Centre shia nung nüngdakba Auxiliary Nurse Midwives (ANMs) aser General Nursing and Midwifery (GNM) staff lezmüksütsü ta pai ashi.

"Linük nung iba ya mezüng asütsü" ta Finance Minister Baruah-i ashi.

Assam sorkari healthcare expansion yaritsü atema health rejutem nung mapa tasen 33,240 adoktsü tebilemba lemsatopogo.

Iba nung MBBS doctors 6,814, AYUSH doctors 82, Dental Surgeons 22, Staff Nurses 10,942, Pharmacists 4,669, Laboratory Technicians 4,669, Radiographers 67, ANMs 1,283, Lower Division Assistants/Accountants 4,625 aser Dressers 67 dena lir.

Sorkarisa Goalpara, Hailakandi, Hojai aser Bajali district tem nung medical college tasen pezü lapoktsü ta Finance Minister-isa metetdaksü.

Assam nung tang operational medical colleges 14 lir aser 10 teyangludak lir. Item reju pezü züngsema state nung medical colleges 28 akümtsü ta pai ashi.

Assam nung Rs 400-crore 'Mission Senehgori' tenzüksü

Guwahati, July 12, 2026

(Agencies): Assam sorkari sericulture sector akangshitsü atema Mission Senehgori ta ser Rs 400-crore flagship programme tenzüksü.

Iba sentong ya talisa GI-tagged Golden Muga Silk nung temulung agüja inyaksü.

Küm asem indang mission ya Ministry of Development of North Eastern Region (DoNER) den yaritepa inyaksü ta Finance Minister Jayanta Malla Baruah-i ashi.

Iba ajanga Assam nung nüngtugu Golden Muga Silk shishilembaba lenmang lapoktsü aser Muga silk production, processing aser trade atema alima nung tongti tesem akümtsü ta Baruah-i ashi.

Mission Senehgori ajanga rearers, reelers, weavers aser entrepreneurs 2.6 lakh shi ajangzüksü imlar.

Sorkari modern silk reeling infrastructure amenoktsü sentong lir aser 2028 tashi nung

Farmer Interest Groups (FIGs) 1,180 aser Farmer Producer Organisations (FPOs) 30 kümdaksütsü.

Iba mission nung shilem ka ama Dhakuakhana nung Muga Silk Tourism Park ka yanglutsü aser iba nung Rs 8.44 crore endoktsü.

Assam sorkarisa Dhemaji nung Rs 10 crore endoka Muga Spun Mill ka yanglutsü. Iba facility ajanga silk waste nungi high-value spun Muga yarn yanglutsü.

MP Tai Tagak-i tzümetsüng agi kongshiba Nari-Koyu semdangogo

Dibrugarh, July 12, 2026

(Agencies): Rajya Sabha MP Tai Tagak-i Lower Siang district nung tzümetsüng agi kanga mejungi kongshia aliba Koyu circle tesem semdangogo.

Centre dang Nari-Koyu constituency nem special financial package ka agütsütsü ayongzüksü ta MP Tai Tagak-i ashi.

MP Tagak den Nari-Koyu MLA Tojir Kadu, sorkar ketdangsürtem aser Panchayati Raj Institution (PRI) teshimtet nübotemi tzümetsüng agi kongshia aliba yimtsüng aika semdang aser teraksa bentsür

aruba asadangogo.

Koyu circle nung tzümetsüng ajanga yimtsüng 20 shi kongshia lir aser kiojen raksatsüba den alu aika raksatsüogo.

Teraksa bentsür aruba ya asadangra Centre sorkar nungi teyari nüngdaker. Ni iba constituency nung rehabilitation aser reconstruction maparen atema relief package balaka meshitsü ta MP Tagak-i ashi.

Paisa constituency nung nübotem yaritsü atema Rs 7 lakh tenla agütsü.

Paisa Arunachal Pradesh MP tem- Tapir Gao o Kiren Rijiju aser

kidanger Assam nungi Members of Parliament dang Centre nungi teyari meshiba nung yaritsü mepishitsü ta ashi.

Union Ministry of Home Affairs nung Joint Secretary Nishtha Tiwari-i anir Centre nungi teshimtet telok kati Arunachal Pradesh nung tzümetsüng agi kongshia aliba district tem semdangba sülen anogo ka lir Tagak-ia semdangogo.

Centre-i akokba tashi state nem teyari agütsütsü. Tzümetsüng agi kongshia aliba district tem nung asadangba sülen takoksa anguba osangtem bendendar ta Nishtha Tiwari-ia metetdaksü.



Assam sorkari taruba anogo 10 tsüngda state ajungalen Rs 472 crore alang narcotics raksa endoktsü maparen ka tenzükogo. Chief Minister Himanta Biswa Sarma-i July 12, 2026 nü Daulashal, Nalbari district nung aliba 14th Assam Police Battalion (APBN) campus nung iba mapa tenzüksü. Iba maparen nung Rs 472.51 crore alang narcotics pua aliba ajunga raksaa endoktsü ta Chief Minister's Office-i ashi.

US Senator Lindsey Graham ajungbena shiranger asü



Washington, Chiteni/July 12 (Agencies): South Carolona nungi Republican yimsüsür tejen US Senator Lindsey Graham ajungbena mapang tatsüka shiranger arishi küm 71 nung süogo, ta pa indang office ajanga sangdong ka nung ashi.

Graham ya Honibar, July 11, nikongdang asü, ta pa indang office-i ashi.

Washington Post ajanga ashiba agi, Lindsey Graham ya Ukraine nungi meyipa shilangba sülen D.C. nung par kidang teku nung timtem adok aser cardiac arrest süa asü.

"Honibarnü, July 11, nikongdang U.S. Senator Lindsey Graham ajungbena mapang tatsüka shiranger asü," ta Office of US Senator Lindsey Graham nungi sangdong nung ashi.

Mapang tatsüka lir US Tir Donald Trump-i Graham asüba atema asükhu lemsatepa X post ka nung, "Senator Lindsey Graham, ni metetba nisung

tajungtem aser Senators rongnung ka, süogo! Pa teti mapa inyaka liasü aser chichiba American Patriot liasü. Lindsey kanga menungratsü!" ta shia liasü.

Israel Ato Kilonser Benjamin Netanyahu-ia pa asüba asoshi asükhu lemsatep aser, "Israel asoshi tembar tajungtiba tem rongnung ka samaogo. America asoshi linük meimer nübu tajang ka samaogo. Ni asoshi medemer tajung ka samaogo," ta ashi.

Graham ya 2003 küm nungi US Senate nung South Carolina tenüng nung inyaka aru, aser foreign policy, national security aser obendangba tsütsü sentsü tulu aketba Republican lenir ka liasü. Pa Senate-i marudang 1995 küm Congress nung tetsüng ajemoker US House of Representatives nung kümsük pezü inyaka liasü.

Pai Senate Judiciary Committee aser tang tesüsa Senate Budget Committee

densema Senate nung tongtipang committee tem nung mendenpuba inyaka liasü.

Hokulbarnü Graham-i Kyiv nung Ukraine Tir Volodymyr Zelenskyy ajurua Ukraine indang air defence nüngdakba aser Russia anema sanctions agütsütsü onüktem jembia liasü.

Iba senden amenba sülen Graham-i yimjung ken o jembishinüba nung Russia aйдaktsütsü asoshi ajungshiba nung China-i shilem tulu agitettsü aser Ukraine mitkar tashi itshitsüba den külemi sanctions tesashiba agütsüba ajanga Moscow-i yimjung ken o jembitsü akok ta shia liasü.

Republican senator-isa US Tir Donald Trump indang team-i party telemsa makai Russia sanctions bill agizüktsü mulungtepogo ta shia liasü.

Iba temzüng yagi Russia nungner indang toztü aser gas aliba linüktem dak tenük yoka Russia-i mitkar inyaksangshi nung senotsü indokba azüoktsü tebilemba nung lir, ta Graham-i ashi.

Graham ya July 9, 1955 küm Central, South Carolina nung aso aser University of South Carolina nungi defrees ngur US Air Force nung inyak aser iba sülen Air Force Reserve nung inyaka liasü.

2026 election agitsü lia pai tawa ang South Carolina nung Senate kümsük ka asoshi Republican nomination ngur liasü.

ADVERTISEMENT

Applications are invited from eligible candidates for One (01) post of Assistant Professor in History at People’s College Mokokchung

Eligibility : MA History with NET/ PhD as prescribed by UGC

Pay : Rs.25,000/- Fixed

Interested candidates can send their resume to LOpcmk@gmail.com latest by 25th July 2026

For any other information contact 9862397815

Sd/-
Chairman
Board of Governors
People’s College
Mokokchung

Venezuela menoknok nung nisung 4,333 asü: National Assembly

Caracas, Chiteni/July 12 (Agencies): Venezuela nung June 24 nü menoknok anaben anokba ajanga nisung asüba 4,333 jungogo, ta National Assembly President Jorge Rodriguez-i Honibarnü osangbenertem dang ashi aser iba lendong agi kongshia alirtem nem ki lema agütsüba maparen taruba hopta nungi tenzüktü ta sangdong.

Ajisüaka ano tasüba 315 tang tashi mejangjateti lir, ta ketdangsüri ashi.

Ketdangsür temi yirur alirtem sangdongba memelenshi 16,740 nung lir aser kasa mapang nisung 6,462 kumzüik aser nisung 17,000 shi talidak ki maka akum.

Acting President Delcy Rodriguez-i taruba hopta iba timtem agi kongshia alir nem mezüng ki 200 lemezüktsütsü ta

Rodriguez-i ashi saka iba dak tali osang tejangja kecha mesangdong.

Rodriguez-isa iba menoknok agi building 856 nung kongshi, aser item rongnung 190 aoyi kuma chirep mesüra 'structural collapse' liasü ta ashi.

Sorkari tang tashinung nisung alitsü ki 25,000 nüngdaker ta asadangteta lir. Ketdangsür temi housing project atema Osma aser Chuspa nung ali kimong 40 shi bushitetogo, koba ajak senteper tasazük 584,000 square meters shi asütsü.

Samar aliba maparen maneni inyaktar. "Takum ali tashi yangji teimla lir. Tensa mejangjaba tesem ka mesüra ana lir, kong onoki maneni takum alirtem bushitar," ta Rodriguez-i ashi.

US-i Iran amak; Tehran-ia Gulf linüktem makogo

Dubai, Chiteni/July 12 (Agencies): U.S. aser Iran na missile aser drone amshia kati ka maktepogo. Tehran-i Deobarnü Gulf kübok linük balala nung U.S. indang facility tem amak aser ashiba agi parnoki Strait of Hormuz shibangogo.

U.S. aser Iran na taoba anogo ishika kati ka maktepba sülen US tir Donald Trump-i ceasefire tembangba metetdaksüogo, koba U.S. aser Israel nati February 28 nü tenzükba rara tembangdaksütsü atema benokba liasü. Ajisüaka Trump-i sensaksemtsü atema kishi sadema lapoka lir ta shiogo.

Shishilemba dang amshiba rongtem amakba sülen tang rara tenzükshiogo. Iran-i ashiba agi, parnoki kümdangshitsü atema temelaba magütsüi aliba lenmang nung rong ka dak kongshiba sülen parnoki strait shibangogo ta ashi aser Deobarnüa parnoki tanabuba rong raksatsüogo, ta shisem.

"US-i iba tesem nung jushiba manen tashi strait shibanga atatsü," ta Iran indang Revolutionary Guards-i ashi.

Ajisüaka U.S. Central

Command-i ashiba agi, khu abenba rongtem iba lenmang ajanga maneni senzüdar, koba ajanga rara metenzük tsüngda alima indang toztü aser LNG pongusü nung kabo shibelena liasü.

Central Command-i ashiba agi, aonung asem tashi nung target 300 dak tema amakba mapang US nungner sepaitemi Honibarnü Iran indang military target 140 makogo. Strait ajanga senzüba civilian mariner aser khu abenba rongtem Iran-i amakba tashi ajemdaksütsü atema parnoki item tesemtem makogo, ta Central Command-i shisem.

Kasa mapang nung Iran indang state media-i tzüküm nung aliba yimtitem aika nung bomb apokba indang metetdaksüogo.

Iba atema telangzüba agüja Guards-i ashiba agi, parnoki U.S. den sendaktepa aliba Jordan linük nung command & control center ka aser drone hangar tem raksatsüogo, Kuwait nung US indang radar site ka amak, Oman nung U.S. aircraft carrier support aser refueling platform tem aser Qatar nung jet maintenance centre aser command facility

ka raksatsüogo.

Qatar sorkari ashiba agi, tanur ka densema nisung asem tashi yiruogo.

United Arab Emirates-ia, parnok indang defense system temi Iran-i yokba missile aser drone tem khadanga liasü ta ashiba den, Bahrain nung kümdangshia alitsü atema ola agütsü aser Doha nunga bomb apokba angashiogo, ta ashi. UAE indang National Emergency Crisis & Disaster Management Authority-i ashiba agi, anepdang missile khaloktsüba lazükogo, saka linük arrtsü adena orr liasü.

Iran nungi khaloktsüba missile asem Deobar anepdang Jordan nung tsük aser osettsüt kar raksaogo, saka nisung asüba osang kecha mali, ta Jordan indang state news agency-i metetdaksü.

Maneni Oman kübok Musandam tesem Deobarnü drone agi makogo, ta state news agency-i metetdaksü, saka nisung asüba osang kecha ali mali iba indang osang magütsü.

Deobarnü Oman tzüküm len shishilembadang amshiba GFS Galaxy rong amakba

sülen India nungner ka samaogo, ta Indian Ministry of External Affairs-i ashi. "Rong nung mena aliba India nungner 11 rongnungi 10 kümezükogo aser ka samar bushidar," ta ministry-i ashiba den iba rong amakba aija liasü.

Tehran-i, container rong ka amakba dak sendakba nung telangzüba agütsüra parnokia sashi-sashia telangzüba agütsütsü ta ashiba sülen Tehran-i item tesemtem amakba ajanga tensa tamajungba kümogo.

Hopta ishika tsüngda Iran-i Kuwait aser Bahrain na makogo, saka April ita nungi Qatar aser May tetenzüklen nungi UAE memaki aruogo.

Qatar ya U.S. aser Iran na tsüngda rara anendaksütsü atema teyongtsüi ia sensaksemtsürtem rongnung ka lir, saka Deobarnü parnoka makogo. Doha-i, parnok amak tashibo parnoki teyongtsüi ia sensaksemtsür ama shilem magitsü ta taoba mapang shir liasü.

Iba rara ajanga Gulf tamendakdak anokshitsüogo, aser kasa mapang nung Iran-i strait of Hormuz shibanga ayuba ajanga alima ajunga

nung toztü jenjang timba kümogo.

Tang rara tenzükshiba ajanga US aser Iran sorkar na rara tembangdaksütsü atema tenangzüktepba ka nung sign süteper aliba tarutsü koma asütsü mejangjai kümogo.

Hopta tetenzüklen Qatar aser Saudi commercial tanker tem amakba sülen US-i Mongolbarnü Iran indang crude oil ayoktsü atema temelaba agüja license agütsür aliba agintsüogo.

Iran indang Foreign Minister Abbas Araqchi-i parnok temeket nung tatalokbatem indang Pakistan Foreign Minister Ishaq Dar den phone ajanga sensaksemogo.

Pakistan ya yimjung atema sensaksemtsürtem rongnung ka lir.

Honibarnü Araqchi aser Oman Foreign Minister Badr Albusaidi na Oman nung sensak asemba sülen tang raratep adokogo.

Strait of Hormuz ajanga rongtem senzüdaksütsü asoshi jenjang agitsü atema tena sensaksema liasü, ta Iran indang foreign ministry otongdar Esmail Baqaei-i Deobarnü ashi.

FIFA World : England aser Argentina na semifinal asayatsü



Chiteni/July 12, 2026

(Agencies): Tang asaya aliba FIFA World Cup quarter-final asaya ka nung England asoshi Jude Bellingham-i goal ana idakja parnoki goal 2-1 agi Norway koka semi-finals tongtetogo.

Asaya nung Bellingham-i England atema goal anaprongla idaktsü, kong mapang apuloktsür asayaba mapang minute asemububa nung tanabuba goal idaktsüba densema lir. Iba asaya akokba sülen parnok Argentina den semi-final asayatsü jangaogo.

Asaya tenzüker minute

36buba nung Andreas Schjelderup-i Jordan Pickford ajanga goal ka idaktsüba sülen Norway pur tejakdang aküm. Goal midaktsü tsünga Harry Kane dak foul menaba atema England-i ashishia liasü saka goal agi.

Iba sülen asaya mezügbuba shilem tembangtsü lia Anthony Gordon-i agütsüba ball ka Bellingham-i kanga junga idakja pa asoshi iba asayamung nung goal pongububa idaktsü.

Asaya tanabuba shilem tenzüker mapang tatsüka tsünga Norway-i Torbjorn Heggem ajanga tanabuba goal

idaktsü, saka VAR asadanga sülen goal midaktsü tsünga Erling Haaland-i Elliot Anderson dak foul menaba nguteta iba goal magi aküm.

Iba sülen Norway-i maneni goal idaktsütsü nongshia asaya aser Kristoffer Ajer-i crossbar nung ball ka metsüoktsü aser Pickford-ia ball aika kümzüka England taküm toktsü.

Atakzükja aliba asaya mapang minute 90 tsünga goal kaka dang idaktsütetba sülen mapang apuloktsür asayaba mapang Bellingham-i England atema tanabuba goal idakja parnoki asaya akok.

Tanga asaya ka nung Julian Alvarez-i kanga dang tongtibang goal ka idakja Argentina-i goal 3-1 agi Switzerland koka semifinal tongtetogo.

Asaya nung mapang talangba ka Lionel Scaloni-i aniba team ya Swiss nung asayatem nem aziokdakja liasü aser parnok asayar 10 dang akümba sülena parnoki maneni kanga meranga asaya.

Asaya nung mezügbuba goal ya Argentina atema Alexis Mac Allister-i minute 10buba nung idaktsü.

Iba sülen Switzerland team-i asaya amokbanger asaya aser Argentina indang defence nem timtem agüja asaya aser minute

67buba nung Dan Ndoye-i goal ka idakja goal kasasa aküm.

Ajisüaka tia maka Switzerland nung asayar Embolo tanabuba yellow card achiba sülen pa nem red card agütsüba ajanga parnok asayar 10-i dang asayatsüsa aküm.

Atakzükja aliba mapang goal kaka dang agütsür tembangba sülen Extra time asaya tanabuba shilem nung Alvarez-i minute 112buba nung Argentina atema kanga dang tongtibang goal ka idaktsü aser iba sülen Switzerland puria goal idaktsütsü meranga asayaba mapang Lautaro Martinez-i counter nung Argentina atema tasembuba goal idakja parnoki asaya akok.

ISSF Shotgun World Cup nung Neeru Dhanda-i gold angu



Chiteni/July 12, 2026

(Agencies): ISSF Shotgun World Cup nung gold medal anguba sülen Neeru Dhanda ya India tsür trap shooter tem rongnungi iba asayamung nung gold medal anguba mezügbuba asayar kümogo.

Haryana nung shooter yagi Honibarnü Lonato, Italy nung gold medal ngua India atema taküm iba shotgun World Cup nung mezügbuba medal ngutsügo.

Iba ya Neeru asoshi ISSF World Cup nung mezügbuba jurila medal asütsü. Maneni tang gold medal anguba ya la indang career nung World Cup nung medal tanabuba anguba lir. Lai Vivaan Kumar den taküm Almaty leg nung mixed trap asaya nung bronze medal ngua liasü. Neeru-i Lonato nung gold medal mangu tsünga Kumar tenati dang taküm ISSF World Cup nung bronze medal ya ngur liasü.

Nüngtugu asayatem aika toktepba asaya nung Indian Army Naib Subedar Neeru-i asayamung tetenzük nungi la form kanga junga aliba sayua liasü. Qualification round nung lai point 125 angutsü aliba nungi 121 ngua la temaba jenjang nung tembang aser medal round nunga lia kanga junga asayaogo.

Final nung la ayong ayonga top three-i ai aser takok ngua liasü. Ajisüaka gold medal atema asaya ya France tsür taoba

mapang world champion aser Olympian Carole Cormenier den kanga toktepa asaya liasü.

Target ana dang anunga aliba mapang tenapronglai poinr 25 ngur liasü. Ajisüaka kanga dang tongtibang mapang Cormenier-i aibelen mena saka Neeru-i kanga süngjemshir asaya-a aibelen memenai asaya akok.

Iba asaya nung taoba mapang junior world champion Italy tsür Erica Sessa-i bronze medal angu ajisüaka Paris 2024 Olympic silver medallist Silvana Stanco bo medal round nung tsükba mezügbuba asayar aküm.

Iba asaya nung India tsürtem rongnungi Manisha Keer-a asaya saka la qualification sülen 10buba nung tembang medal round atema qualify mesütem.

Kasa asayamung nung India nung tebur asayatemunga masayatet aser parnok rongnung ka danga final tonga masayatet. Asian Games medallist Kynan Chenai 71buba nung tembang aser kasa mapang nung Prithviraj Tondaiman shiba Ranking Points Only (RPO) atema dang asaya liasü pa-a 32buba nung tembang liasü.

Maneni skeet asaya nunga India nungertemi junga masayatet aser shooter ka danga final metongtet.

Lonato nung iba asayamung ya 2026 calendar nung ISSF Shotgun World Cup pezübuba lir.

South Africa nung football asayar Jayden Adams süogo



Chiteni/July 12, 2026

(Agencies): South Africa nung football asayar Jayden Adams, par linük tenü nungi 2026 FIFA World Cup nung asayaba sülen anogo ishika dang lir arishi küm 25 nung süogo.

Adams ya World Cup nung South Africa pur group-stage asaya asemprongla nung asayaogo. Pa Mexico aser Czechia na den asayaba mapang tetenzük nungi asaya aser South Korea akokba asaya nung substitute ama asaya liasü. Ajisüaka pa Round of 32. nung Canada goal 1-0 agi makokba asaya nungbo masaya.

South Africa indang Minister of Sport, Gayton McKenzie-i Adams nem

tetushi agütsügo, aser ashiba agi, pa asüba ya linük nung football asayaba lokti atema kanga takoksa tulu lir.

"Mamelodi Sundowns aser Bafana Bafana nungi midfield asayar Jayden Adams arishi küm 25 nung asüba osang angazüka kanga aoksar aser temulung koremer.

"South Africa nung lanur football asayar tajungtiba ka taküm samaogo, aser par kibong, teammate aser supporter million aika den linük mang ayimer," ta pai ashi.

Pa koda ser asü indang ondong official osang kecha agüja mali. McKenzie-isa, pa asüba dak sendakba nung olulu osang kecha meprongshitsü atema azioktsü mepeshia metetdaksügo.

Arishi küm 25 tain asayar tasü mang ya Cape Town nung Honibar anepdang par kidang nungi ngutetba sülen bushisüngdang tenzüko, ta police-i metetdaksügo.

Adams ya Stellenbosch FC indang academy nungi anitetba asayar ka aser pa ya club-i anitetba asayar ka den professional contract ka sign asüba mezügbuba asayar liasü. Club nungi asaya 139 nung asayaba den 2023 Carling Knockout title abenba sülen pa Mamelodi Sundowns nung aden, kong pai Premiership aser CAF Champions League koka liasü.

International jenjang nung pai South Africa puri AFCON 2024 nung bronze medal anguba nung teyari agütsü aser pa 2026 FIFA World Cup nunga asayaogo.

World Cup nung Czechia den goal 1-1 agütsür tembangba asaya masaya tsünga Adams tetsü Marianna asü.

Pa asüba osang angazüka South African Football Players Union-ia asükhu lemsatepogo.

"Pa asüba ya par kibong, teammate, club, football fraternity aser linük atema takoksa tulu lir," ta union-i ashi.

BILEMDANGANG

"Tajung inyakyonga tamajung inyakyonga tashishibo odang alitsü."